

3 Juañ

Juañja maigua ne kalta gaune zũngajenapanaldiamak

Meja ai kalta gauwane: Duwe Jesúja 12 shaxaldixakuega aldéñ izhgajañguxa Juañja jalde kalta gauwane. Ega na Duwe Jesúja ají múldigaba guaxaldixa gaxanekue nañga agatsé. Dueba negatshak jiaga Duwe ipananekeue aksanexalga izhone.

Mekuetshi kalta gauwane: Juañja jalde kaltaki ezua Asia baxe Duwe ipanane izhgajañguxa Gayutshi gauwane (1.1-2).

Jinak ai kalta gauwane: Gayu izhogueñkaga Duwe ipananekeue aksaneke Aldiútepejañki Duwe shalda namaklde guakakue ipanakí atshatone. Guatshak Gayuja zũnake muldetua kepanane shalda, amak atshalga nogakue akbeyaldiamak gauwane.

Juañja maigua ne kalta gaune

Gayuki zeñ akzukuxa

¹Nasukuá Gayu namak giemi mezhgajañgugek, nas duebak Duwe ipananekeue aksanekugek ni kalta mikuzgauwatokú.

²Shui mezhgajañguge, Nauwijatek ekí makshishikuge: Aldunaldi janshibé guildexabaldogamakga, jai niuwabak jiaga janshibeñgaba migatseshi, ni miya jiaga mikzéegaki mezhokshakue ni makshishatokú.

³Akze, Duwe ipanane tuexa zhinik aldakákueja mañki sakí namaklde zũnkuahamakga abá naldakí jian atshiji mizhuká ne mawatune nagabeyatshak, jzúxaita ni zeñ maldakzukú!^a ⁴Akze, ji akaldak zeñ nakzukuakí. Aldunaldiñki nají sukua minekuañ abá naldakí namaklde zũnkuahamak atshalga za izhoxabinukakue mimaldukaldatshak.^b

^a 1.3 2Jñ 4; 3Jñ 6 ^b 1.4 1Kt 4.15; Plp 4.1; 1Ts 2.20; 1Tm 1.2

Duwe shalda namaklde guakakueki kagaunegakue

⁵Shui mezhgajañguge, Duwe ipanane e shalda namaklde shizhiji miñkabizhatukakue, tuabáldekue jiaga kagaunexabaldogatshakna, abá naldakí Jatek axatshakue migatsahamak ni matshí.^c ⁶Aikuega na jai Duwe ipanañkaldegaba kishjuizhaldegéñ, Duwe ipananekeue izhgajañgui mizhuka ne mawatune zũngabene. Akna mañki Jate axazauwakuamak axazauwiña na, ekue mixabizhaldinik mokie aldeyapanatshak, jigabá kagajuezhaldiauxa kagaunegakue ni majañgukú.^d ⁷Jinake naldakí. Ekueki Duwe Jesú axazauwiña na, e shalda namaklde shizhiji san san abizhatogák. Amak ajanashatogatshak, Duwe ipanazhánekuejaña kagaunegakue ajañguazhá guane. ⁸Nakna nasũ Duwe ipanañkaldekuañ zũnake muldetua kagauneshi kepanakue zũngatsé. Ekíki ekueja Duwe shalda namaklde guagamakga atshá zhuxaña katshixa ishkazguakualdiamak.^e

Mielde agastuakue, mieldeki agastuasé

⁹Ekí miñmejiña Duwe ipanamine exa mishjuizhaldekakuañ kalta miñkuzgaunuge. Naldatshak jiaga, Aldíutepejañki aldéñ za mishjuizhaldekakuek miñsanekldana akzeshi na, nas miñsanegazhánaka najañguamakga ai nagipanazhá guane. ¹⁰Akze, aldéñki netshanshaldiamak nusagatsaldi sha nakuashi izhuka. Ekí negatogatshak “auxabé neká” akldegazhálde na, Duwe shalda guaxal neyatukakue kepanazhálde, ni mieldek kepanshakí. Ne mieldejañki kepanaldiake, eñki akldé maiñ na ishjuizhaldeshi guakuak kakiwatiji izhuka. Ekí atshatuka nukaugakna, exa neyaldatshak saldiña mishjuizhaldegéñ “ekí atshasũnze nibatú” axaldexaldikue nakldá.^f

¹¹Shui mezhgajañguge, mieldeki ekí shane za atshixa matualdiake amakbé atshabaldáldi. Ekí ne, janshizhe za atshixakue niñkauwañki kagastuwi amakbé atshabaldoxaldí. Akze, mieldeki janshizhe za atshál izhukaki, Jatetshi neklde. Mieldeki shane za atshál izhukaki, Jate “me ne” aksũnze nakldá.^g

¹²Guatshak Demetiúki saldiña nekueja “janshizhe izhogamakga nakldá” akuaka. Ekíga na, aldéñki Duwe shalda namaklde zũñkuahamak izhogéñ zhinik na janshizhe ne awatuñshixa. Nasũ jiaga “eñki janshizhe nakldá” gakuaka. Akze, ji kabikbeñkákí “namak sha nakbé” mikué naldashá.^h

Aldiwe akbene

¹³Guatshak akldé matshuwi mikbendana nakzegatshak jiaga, kaltakgaki auxaga mikbeyasũñ nzhakzék. ¹⁴Akldé janshibeñki, nauwa

^c 1.5 Alm 12.13; Eb 13.2 ^d 1.6 Alm 16.2; Tit 3.13-14 ^e 1.8 Mt 10.41,42 ^f 1.10 1Tm 5.20
^g 1.11 Pr 4.14; Jñ 13.15; Alm 12.9; 1Pe 2.21; 1Jñ 3.6 ^h 1.12 Jñ 21.24; 1Tm 3.2,7

sheñga nas naldi eñka matuál neyaldikue jañguge. Ekíki ma na zhualdesañ yatexaldek señgabá dulda zhikshakualdiamak.

¹⁵ Guatshak jexa majañguxakueja majañguxá ni mikbé. Ekibeñga jiak tuexa najañguxakuek ezua ezua kajañguge kabakbeyaldí.

Jatejañga muldetua aldunaxa señgabá mikzukualga shi noshí. Ekíga shi naldí.